

福建通紀卷十二

清二

聖祖康熙元年魯王在金門

海東逸史

正月初八日匡城外屋王令要六千間水部門城邊起至路通橋共一千三百間內空地千餘間不足二十日復匡荷宅柳宅金墩下鄭道竊打鉄墩等處復千餘間又不足將村邊田園百餘畝盡填作地起蓋又不足復自半洋起至東門河港浦下止洋中之田量二百餘畝作地起蓋所匡屋給銀大間八兩中六兩小四兩田每畝三兩卽日逐民離屋別住與左右兩鎮兵住城內住兵名曰包城外住兵名曰鎖經院巷與妓女住開元寺前與戲子住龍山巷與打花鼓人住各千餘人

王兵家眷搬至本年正月未盡蓋實兵有六千人而門下作買賣者十餘萬往來船隻民間寸步難行復於各鄉取正舵工鄉間人未必能使船每

名折銀五兩

以上榕城紀聞

四月福建總督李率泰奏定海小埕賊眾盤踞臣密會靖藩各調官兵擊走之又萬安所先經遷毀續被僞鎮楊宣等築壘新城臣復密會提臣馬得功調發官兵夾勦賊不能支揚帆遠遁

東華錄

五月八日明招討大將軍延平王鄭成功薨於東甯初後提督萬禮密約黃梧欲據思明州以叛後隨征南京死已祀忠臣祠矣事泄撤其木主守銅山將蔡祿郭義其黨也脅忠臣伯張進叛進詐許置酒請會欲發火藥與之俱焚蔡郭知之不赴進遂放火自焚清兵入銅山洪旭會南澳忠勇侯陳豹敗之清兵退成功拔翁天祐鎮守銅山而厚卹張進之家豹守南澳近二十年許龍蘇利皆畏之驕傲專恣數違成功令周全斌以銅山思明州兵取南澳豹不敢迎戰揚帆入廣東投誠封爲慕化伯未幾病疫死成功嚴諭搬眷而鄭泰洪旭黃廷等皆不欲行於是不發一船至臺灣而差船來調監紀洪初闢等十人分管番社皆留任不遣島上信息隔絕四月成功遣兵官楊都事奉令箭到思明州殺董氏及其長子經以與乳母

生子之故洪旭等不肯奉令殺楊都事而訛傳周全斌奉密諭欲殺諸將
十餘人於是人人自危旭使全斌回廈門港卽執而拘之黃昌勸鄭泰遂
殺之全斌求救於董氏洪旭亦依違乃得免至是成功疾革猶日強起登
將臺持千里鏡望澎湖諸島是日登臺罷冠帶請太祖訓出坐胡床進酒
讀至第二帙嘆曰我有何面目見先帝於地下也兩手掩面而逝計成功
自隆武丙戌起兵經營海外十餘載進取之志卒未能達及退據臺灣越
年竟歿春秋三十有九提督馬信及諸鎮將黃昭等議以其弟世襲護理
大將軍印未幾馬信以哭成功過哀病故世襲以黃昭蕭拱宸爲腹心劉
國軒管鎮事謀自立報至思明州鄭泰洪旭黃廷工官馮澄世參軍蔡鳴
雷等立長子經爲嗣稱世子發喪卽位是年永歷帝已先一日被難而經
猶奉其正朔

海上見聞錄小腆紀
年清史紀事本末

海上諸臣議復奉魯王監國

海東
逸史

平南王尙可喜奏總兵官許龍擒鄭成功之弟鄭成賜於廈門得吉嘉獎

下部議叙

六月諭兵部福建水師應設提督一員總兵二員此水師官兵應駐何處每處應設官兵船若干爾部會同大學士蘇納海尙書車克速議奏聞
七月靖南王耿繼茂奏漳州水師經制兵三千原設遊擊二分爲二營恐兵多不便約束請增遊擊一改爲中左右三營從之

增福建長樂營游擊一

以上東華錄

十月

小腆紀年作十一月事

洪旭鄭泰以兵千餘人送世子經臺灣周全斌爲五軍

馮錫範

澄世子

爲侍衛陳永華爲諮議參軍至澎湖其將李思忠船飄至臺

灣知諸將有謀逃回經因乘風入鹿耳門登岸全斌令連夜伐木爲柵扎

營次早黃昭會諸將出兵值大霧晝冥跬步不可視諸將多迷誤失期惟

黃昭兵先至攻其前劉國軒兵至攻其後破營而入經兵却復擠而前黃

昭攀木梯爲流矢所中墜下全斌斬其首大呼示衆軍士皆迎降大霧忽

晴日已嚮午經入安平鎮請世襲待之如初世襲委罪於其僕蔡雲雲自

縊收殺蕭拱宸李應清曾從龍等餘不問諸將營兵撥守汎地如故時靖
南王耿繼茂移鎮福建與總督李率泰遣中軍李有功等至思明州鄭泰
等議照朝鮮國例復耿李使疏請泰遣中軍楊來嘉入京待命不報釋來
嘉回京中遣戶部郎中貢岱兵部郎中金世德入閩招撫凡海上文武官
投誠者照品級補用

海上見
聞錄

十一月經率周全斌等同其叔世襲回思明州後世襲入京歸命授精奇
尼哈番顏氏芝豹自戍所發回准在京同住

全上

二十三日魯王殂於臺灣

海東逸史
小腆紀年

總督李率泰杖斃諸生林肇震等初順治十八年生員鄧譔欠鹽商舉人
陳殿邦銀殿邦壻曹鴻芝內姪王欽祖指使殿邦兄忠陞出名賄鹽運司
王志佐指作鹽餉板責鄧譔十學生員林芬等數百人公投上憲鄧譔哭
於文廟忠陞等以親友涵入廟中抱先賢牌位入運司署毀其公座督撫
令司道在明倫堂公讞時左布政翟鳳翥右布政于際清按察使祁彥提

學道宋祖法糧驛道陳台孫欽祖布置已定復板責鄧譔譔挾刃自刎觀者萬人狂呼號哭以磚瓦擲破司道頭顱各官踉蹌走避諸生乃擡譔屍置文廟廡下羣往按撫衙門哀懇司道途遇簽名生員陳元鉉鄭有祚陳作霖鎖拏監禁頃刻烈風雷雨天昏地黑時按撫遼陽范平在署奉太夫人諱冒雨微行到府學見鄧生死狀卽夜拏陳忠陞等十一人監禁次早發放陳元鉉等三人出示曉諭示云閩中士子不特文章甲海內而且意氣薄雲霄當卽具題參王志佐擅責生員以致自刎云云司道欲肆其毒手加士子以毆官鼓噪罷市之罪將林芬林晟黃國壁鄭鼇毓劉元蔚陳章陳謨張星高巖林秋來潘琦劉新輝林肇震盧灼陳元鉉鄭有祚陳作霖十七人通詳總督李率泰從漳州回省與致仕候代之撫院徐永禎承新旨有紳衿欠糧解京之語遂疏稱欠糧者皆林芬等毆官所致六月范平回京諸生以紙寫其照以木雕其像率泰聞之大怒卽於是日擒十七人監禁並行學褫革譔第鄧誌衣巾七月宋祖法拏執諸生應考卞鼇盧

登翁欽仁等百餘人卒不入試九月按院之疏下矣陳忠陞王欽祖曹鴻芝俱褫革王志佐削職仍究其庇商情節諸生行學戒飭新撫院許世昌遂行按司轉行刑廳訊問志佐各官承率泰風旨開志佐罪率泰遂揚言曰運司既無賄狀諸生緣何倡亂竟不釋放戒飭泉州推官翟廷諧獻媚肆威妄行羅織新撫屢駁翟終不開豁然新撫回疏並不波及十七人也至是左布政翟鳳翥調遷假手其黨李之芳疏揭宋祖法不能約束諸生因以中傷十七人下其章於總督究問戒飭之旨既虛十七人遂長繫逐一熬審回疏竟致諸死律幸范平在京當事諗知其情十七人不議罪仍前戒飭在案學政陸求可行考校特請發落以便入試率泰大怒遂提出十七人竟違旨革去衣頂解入衙門森列兵丁刑具十七人毫不畏懼從容魚貫俯伏階下率泰發令曰棍責呈首林芬等四十棍當時斃杖下者林肇震張星兩人其餘皮肉腐爛蓋率泰指使棍役下毒棍以爲人人必死後鄭鼐毓至次年二月病死林芬病至六月死林晟最崛強受棍時毫

不出聲至庚戌年冒寒而死陳章並十一人或年七十餘或八十皆強健不衰而忠陞逾時卽死王志佐去位卽死于際清祁彥宋祖法翟廷諧亦卽相繼而死率泰則癰腸寸潰流出月餘求死不得鳳翥再任布政亦瘵瘵脫領艱於飲食卒與率泰俱死於福建爲十二人所日擊

竹間十日話

靖南王耿繼茂奏僞鎮威將軍左都督楊學皋率所屬官兵三千餘名人民家口三萬有餘投誠請從優議叙得旨歸順人民聽其自便安插尋授學皋左都督加太子太保給三等阿思哈尼哈番

十二月耿繼茂奏總兵官吳萬福奉命招撫僞總兵王士鰲等歸誠

耿繼茂奏自順治十八年九月起至康熙元年七月止陸續招撫僞將軍都督總兵並副參遊守千把總等官共一百九十員兵共四千三百三十四名家口共四百六十七名請敕部酌議各官給與銜俸兵丁入伍支糧裁福建巡海道缺歸驛鹽道兼理裁巡漳道缺歸守漳道兼理命福建水師提督帶兵四千駐紮海澄縣左路水師總兵官帶兵三千駐

紫閣安縣右路水師總兵官帶兵三千駐紮同安縣

裁福建海澄總兵官

以上東華錄

二年永明王訃至鄭經猶稱永曆年號

三藩紀事本末

三月荷蘭國遣出海王統領兵船至福建閩安鎮助勦鄭氏

東華錄

鄭經使洪旭守思明州鄭泰守金門黃廷守銅山而經得泰與黃昭往來

書欲襲取之泰不自安稱病不來見四月參軍陳永華謀以經將回東甯

調泰爲居守戶官統轄諸鎮鑄居守戶官印遣協理吳慎齋至金門泰遣

弟鳴駿入謝經慰諭之見陳永華情款甚密鳴駿回力勸其行泰遂於六

月六日帶兵船並餉銀十萬至思明州經以通書黃昭事面質之遂交與

洪旭監留周全斌率兵並其船獨蔡璋一船走脫天未明至金門鳴駿倉

卒與泰子纘緒率諸將及兵丁眷口下船入泉州港向總督李率泰投誠

船二百餘號兵八千餘人全斌等追之不及泰見子弟家眷兵眾皆入泉

州港遂自盡而死

海上見聞錄小腆紀年

七月以黃而輝

黃廷子

爲思明知州

海上見聞錄

八月黃廷自銅山入見經慰諭之右武衛楊富左武衛何義禮官都事陳彭等皆先後內渡投誠上

靖南王耿繼茂奏僞尙書參知軍政事蔡雷鳴密令其子僞侍郎蔡協吉僞通政蔡源等攜眷來歸應請敘錄

投誠同安伯鄭鳴駿奏報伊兄鄭泰遺命子鄭纘緒統所部文武各官四百餘員水陸兵丁七千三百餘名各帶家眷駕舟艦一百八十餘號直抵泉郡港口投誠並繳僞敕印等件

授福建投誠同安伯鄭鳴駿爲遵義侯永成伯鄭纘緒爲慕恩伯

九月耿繼茂奏僞慶都伯王秀奇投誠

福建總督李率奏僞忠靖

一作精忠

伯陳輝率文武僞官一百三十三員兵

一千六百名家口八百餘名投誠管理福建安輯投誠事務郎中賁岱奏僞統領挂甯南將軍印左都督陳舜穆率轄下總兵二員副總兵六員參

將二十員遊擊十九員都司三員守備一員兵部主事一員工部郎中一員監紀推官二員兵丁一千名投誠

以上東華錄

荷蘭集夾版船十六隻兵數千人會約靖南王總督同攻金廈兩島事定之日欲求浯嶼築城貿易如廣東香山澳例復准納貢互市

海上見聞錄

十月陸路提督馬得功督鄭鳴駿以船數百號出泉州港水師提督施琅同黃梧出海澄港靖南王耿繼茂同荷蘭兵札營同安劉五店約期渡海李率泰奏僞總兵魏明等率眾來歸請從優錄敘

李率泰奏延建等處皆高山峻嶺賊首王鐵佛等倚險結巢建甯延平邵武將弁統兵剋期夾勦三路齊進奮勇力戰殺賊一百一十七人生擒王鐵佛等六十八人正法又奏鄭錦遣僞副將林維等率舟師由海門欲乘風直入海澄燒新造戰船提臣施琅密遣守備王明等統水師夜半直抵海門賊船前來拒敵我兵奮勇陣殺僞副將林維等生擒賊將兵丁共一百二十五名奪獲船隻器械

十一月李率泰奏海寇五百餘人由梁山侵犯海疆總兵官王進功參將折光秋夾擊大敗之殺賊一百六十餘人生擒九人

耿繼茂奏鄭芝龍子鄭世襲素蓄歸順之心緣鄭成功攜往臺灣及成功暴亡復被逆孽鄭經帶回廈門脫身無術至是乘間率僞文武官二百二十四員水陸兵一百二十名家口船隻盔甲器械等物投誠又僞都督鄭賡係同安伯鄭鳴駿之弟攜帶官兵共三百一十五員名家屬共三百四十二名口投誠

耿繼茂奏僞都督僉事陳宗等文武官二百三員兵丁三千二百二十五名並戰艦盔甲器械等物投誠

以上東華錄

鄭經率黃廷周全斌等會於金門全斌曰海澄之師猝未敢前惟泉州會合紅夷夾板而來其勢甚銳破之則各港氣奪不戰自退矣洪旭曰先王破達素悉空廈門背城一戰乃出眷口暨流寓之宗室紳兵寄旋各嶼而列舟師於大担以爲全斌援荷蘭船高而且大一船有大小煩銃千餘號

橫截中流爲清船藩蔽是日礮聲從辰至酉相續不絕一似霹靂經見荷蘭船礮多衆寡不敵乘潮漸漸退出浯嶼全斌等十三號船在後迫於潮長不得出直繞荷蘭船之後衝大鯨而入荷蘭船發煩齊擊無一中者馬得功坐鳴駿中軍船全斌誤以爲鳴駿直前攻之黃廷中軍將吳朝宰經親軍將蕭乘龍前後夾攻揮兵過船得功親隨鐵甲精兵三百人皆被殺得功頓足自投水而死全斌訊降卒知之嘆曰吾欲擒獐乃中一虎豈是賊未合死邪再遇楊富船全斌喝曰叛賊今日是汝死日冲入逼之富投水遇小艇救之得免已而守高崎將陳昇密款於官軍漳州軍施琅黃梧乘潮落援之耿繼茂李率泰亦各濟師經衆寡不敵退守銅山黃廷議欲再守數日全斌以爲船多損壞不可遂棄兩島而去官軍入墮其城收其寶貨婦女而北梧勸率泰乘勝逼銅山率泰曰窮寇勿追急之則逸入臺灣後難圖矣乘彼人心未定招撫以散其黨羽計之上也乃遣使至銅山宣布朝廷德意密通諸將許生擒鄭經者封同安侯鎮守泉州如海澄公

例惟洪旭笑而却之先是李率泰給示准島中百姓過界思明州知州黃而輝請准島民渡海令下三日永華復勸經禁之至是清兵入島遣民尙數十萬多遭兵刃男婦係累童稚成羣若驅犬羊連日不絕而投誠兵搜掠財物發掘塚墓至剖鄭彩之棺而殘其屍墮城焚屋斬刈樹木遂空其地嘉禾斷人種之讖應焉

海上見聞錄
小腆紀年

十二月耿繼茂李率泰等奏臣等統率大軍渡海攻克廈門賊眾驚潰登舟水師提督施琅會荷蘭國夾板船邀擊之斬首千餘級乘勝取浯嶼金門二島鄭錦周全斌等勢窮宵遁

東華錄

案此次戰事官軍實大敗大將馬得功至投水死乃掩敗爲勝如此則經自棄兩島而官軍得以爲功耳

耿繼茂等奏十月二十八日鄭錦等遣兵五千人突犯雲霄右路總兵官

王進功率官兵逆擊之斬殺過半餘眾盡赴水死

東華錄

總督趙廷臣閱界

福州府志

三年正月管理福建安輯投誠事務戶部郎中賁岱奏鄭芝豹生母黃氏率子姪眷屬等赴閩投誠

李率泰奏原任提督侯馬得功攻取廈門金門二島力戰身死得旨從優議卹

靖南王耿繼茂奏年雖未邁疾病相仍子精忠未諳軍旅懇賜遣歸俾臣力疾教訓以備驅策允之

授福建投誠僞伯陳輝爲募仁伯

二月耿繼茂等奏福寧總兵官吳萬福招撫僞鎮林國樑投誠隨遣遊擊李應先等協全攻克長腰東蚶二島寇巢破滅阮春雷張煌言僅以身免得旨從優議敘

以上東華錄

鄭經駐銅山諸軍乏糧周全斌欲襲洪旭而併其船旭亦防之值海風大作船各飄開全斌遂率其衆入漳投誠旭以杜輝守南澳輝亦掠其輜重投誠林順亦自鎮海投誠旭謂經曰金廈新破差官僕僕前來非爲招撫

實窺探以散人心當速過臺灣遲則變生肘腋矣三月經乃同馮錫範陳永華等悉眾東徙命黃廷斷後工官馮澄世一船爲其家丁所迫自投海中死旭以二十舟候黃廷同行廷部兵將多不願適黃梧遣陳克竣來招降廷遂入漳投誠旭自往東甯過澎湖設重鎮守之改東都爲東甯天興萬年二縣爲州分諸將耕屯荒地造亭館以處宗室遺老之相從者度曲徵歌示無西意以與民休息焉李率泰盡徙諸島遺民於內地開界溝築界牆五里設礮臺烟墩二十里設營將守之弁兵得賄縱出入或睚眦殺人失業流離之狀不可言矣

海上見聞錄小腆紀年皇朝年表

耿繼茂奏僞將張燦吳盛等率領兵民渡海投誠羣賊分舫來追意欲乘機入犯內地總兵官王進功統兵馳勦殲賊眾於陸壠破賊巢於下蔡斬首千餘級接應投誠人等入界五月耿繼茂等奏三月初六日臣與總督李率泰提督王道功海澄公黃梧等領兵先後至八尺門僞威遠將軍翁求多率兵民六萬餘人納款十

四日夜半渡海進拔銅山斬首三千二百餘級僞都督余寬等率僞官兵家屬人等三萬二千四百餘名出降所獲船隻盔甲器械無算鄭經僅存數十艘乘風遁走臺灣計閩海地界凡數十島賊巢布列至是掃滅殆盡授投誠周全斌爲承恩伯食三等伯俸

六月李率泰以病求罷諭留之

以朱昌祚爲福建總督

由浙江巡撫遷

授投誠黃廷爲慕義伯

閏六月以福建興化泉州漳州三郡旱災命督撫加意賑恤

加致仕福建總督李率泰爲正一品

李率泰奏總兵官李長榮等出洋會勦張煌言擊敗五千餘人擒僞總兵張賢等並獲船隻器械

七月管理福建安輯投誠事務賁奏自康熙元年至三年止合計投誠文武官三千九百八十五員食糧兵四萬九百六十二名歸農官弁兵民